

Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaat

Aalisarneq pillugu Inatsisartut inatsisaanni nr. 18, 31. oktober 1996-imeersumi, ilaatigut Inatsisartut inatsisaatigut nr. 12, 3. december 2012-imeersukkut, Inatsisartut inatsisaatigut nr. 18, 3. juni 2015-imeersukkut kingullermillu Inatsisartut inatsisaatigut nr. 28, 28. november 2016-imeersukkut allanngortinneqartumi § 8, imm. 2, § 9, imm. 1, § 10, § 10 a, § 10 b, imm. 1 aamma 2, § 11, § 13, imm. 2 aamma 3, § 14, imm. 2 aamma 5, § 21, imm. 2, §§ 23-25, § 26, imm. 1, § 33, imm. 1, nr. 2-4, aamma imm. 2 aamma 3, § 34, imm. 3 aamma § 38, imm. 3 malillugit aalajangersarneqarpoq:

Kapitali 1

Atuuffissaatillu

Atuuffi

§ 1. Nalunaarut atorneqassaaq inuussutissarsiutigalugu aalisarneq pineqartillugu:

- 1) Angallatit Kalaallit Nunaanni nalunaarsorsimasut atorneqarneranni.
- 2) Umiatsiaaqqat atorneqarneranni.
- 3) ATV-t, qamuteralaat qimussillu atorneqarneranni.
- 4) Angallatit nunanit allaneersut Kalaallit Nunaata aalisarnikkut oqartussaaffigaani aalisartut atorneqarneranni
- 5) Angallatit nunanit allaneersut kalaallit pisassiissutaannik Kalaallit Nunaata aalisarnikkut oqartussaaffiata avataani aalisartut atorneqarneranni.

Imm. 2. Taakku saniatigut nalunaarut inuussutissarsiutiginagu aalsarnernut akuersisummik piumasaqarfiusunut atuutissaaq.

Nassuaatit

§ 2. Nalunaarummi matumani paasineqassaaq:

- 1) "Aalisarneq pillugu inatsit" tassaavoq Kalaallit Nunaanni aalisarneq pillugu inatsit qaqugukkulluunniit atuuttoq.
- 2) "Kalaallit Nunaata aalisarnikkut oqartussaaffia" tassaavoq Kalaallit Nunaata aningaasarsiornikkut immikkut oqartussaaffia, Statsministereqarfiup tamanna pillugu nalunaarutaa aalajangersarneqarsimasoq naapertorlugu kiisalu Kalaallit Nunaata imartatut oqartussaaffigisaa.
- 3) "Tunngaviusumik titarneq" ima paasineqassaaq, Kalaallit Nunaata aningaasarsiornikkut oqartussaaffigisaa pillugu Statsministereqarfiup nalunaarutaani aalajangersarneqarsimasut titarnerit tunngaviusut.

- 4) "Tunu" ima paasineqassaaq, Kalaallit Nunaata aalisarnikkut oqartussaaffigisaa inissisimasoq 59°N-ip avannaata tungaani 44°V-ip kangiani aamma 59°N-ip kujataata tungaani 42°V-ip kangiani tassungalu atasuit kangerluit.
- 5) "Avataasioluni aalisarneq" imatut paasineqassaaq aalisarneq tunngaviusumik titarnermiit 3 somilit avataanni aamma Kalaallit Nunaata aalisarnikkut oqartussaaffigisaata avataani ingerlanneqartoq.
- 6) "Sinerissamut qanittumi aalisarneq" tassaavoq aalisarneq Kalaallit Nunaata aalisarnikkut oqartussaaffigisaani tunngaviusumik titarnermiit 3 somilit avataaniit timaani ingerlanneqartoq.
- 7) Uuttuinermi "BRT" ima paasineqassaaq brutto register tonnage uuttuinermilu "BT" ima paasineqassalluni bruttotonnage, umiatsiaaraq angallalluunniit BRT aamma BT malillugu uuttorneqarpat uuttueriaaseq BT atorneqassaaq.
- 8) "T.t" tassaavoq uuttueriaaseq isumaqartoq tamakkerlugu takissusia. "T.t" tassaavoq narlorissumik titarlugu angallatip siuata siorpiaanut aquata aqorpiaanut tamakkerlugu takissusia.
- 9) "Tulaassisussaatitaaneq" ima paasineqassaaq pisarineqartut, Kalaallit Nunaanni nunami suliffissuarmut piareersarlugit suliarineqanngitsut tunineqartussat.
- 10) "Suliarineqartut" ima paasineqassaaq, pisat suliarineqartut, passunneqartut poortorneqartulluunniit pillugit killiliinertaqanngitsumilli sulineq, tisaneq, asiunaveersaaneq, qeritsineq, pujoorineq, tarajorterineq, uutsineq, tarajornitsumik "qajulerlugin" uninngatitsineq, panertitsineq imaluunniit allatut piareersaaneq. Suliarineqartunut ilaanngillat saliinerit, niaquiaanerit sikulersuineriluunniit.
- 11) "Taamaaqataanik akuersissut" ima paasineqassaaq, umasoqatigiaat assinginik aamma avataasiolermi imaluunniit sinerissamut qanittumi angallatini immikkoortut taamaaqataanit aalisarsinnaanermut akuersissut, ukiup siuliani qinnuteqartup pigisimasaa.
- 12) "Nutaamik ingerlatsilersut" ima paasineqassapput, inuit imaluunniit inatsisitigut pisinnaatitaasut pisussaatitaasullu aalisartut ukiumi qaangiuttumi aalisarnermut qinnutigineqartumut taamaaqataanik akuersissummik peqarsimanngitsut.
- 13) "Angallat" ima paasineqassaaq, aalisarnermi atorneqartoq assartuut.
- 14) "Umiatsiaaraq" ima paasineqassaaq, angallat sunaluunniit 6 meterinik takissusillit (t.t.) imaluunniit naannerusumik takissusilik aalisarnermut atorneqartoq.
- 15) "Attartornissamik isumaqatigiissut" ima paasineqassaaq angallammik attartorneq, inuttaqartillugu (akunnikkaarlugit attartorneq) imaluunniit inuttaqartinnagu attartorneq (bareboat-charter), aalisakkanut aalajangersimasunut piffissamilu aalajangersimasumut aalisarnermut atorneqartussaq.

Kapitali 2

Akuersissut aamma atugassarititaasut

§ 3. Inuussutissarsiutigalugu aalisarneq kiisalu akuersissuteqartussaatitaalluni inuussutissarsiutiginagu aalisarneq taamaallaat ingerlanneqarsinnaavoq aalisarnermut akisussaasumit naalakkersuisoqarfimmit atulersinneqarsimasoq akuersissut atorlugu.

Imm. 2. Akuersissut piginnittumut aalajangersimasumut ataatsimut aamma angallaqateqarluni aalisarnissamut imaluunniit umiatsiaararsorluni aalisarnissamut atulersinneqartarpooq.

Imm. 3. Akuersissummik pigisaqartup angallat aalisarnermut atugarineqartoq pigissavaa, tamannali attartornissamik isumaqatigiissuteqarnermi atuuttanngilaq.

Imm. 4. Angallatit, umiatsiaaqqaq, ATV, qimussit qamuteralaaallu taamaallaat atorlugin aalisartoqarsinnaavoq.

§ 4. Aalisarnermut akisussasoq naalakkersuisoqarfik akuersissummik atulersitsinermi piumasaqaatinik atugassarititanillu aalajangersaasinmaavoq, tassunga ilangullugit tulaassisussaatitaaneq pillugu piumasaqaatit.
Imm. 2. Piumasaqaatit atugassaritallu akuersissummi atulersinneqartumi takuneqarsinnaassapput.

§ 5. Angallammik aalisarnissamut akuersissummi atulersinneqartumi angallat angallatillunniit aalisarnermik ingerlatsisussat allanneqassapput, taamaattorli takuuk imm. 2.
Imm. 2. Nipisanniarnermi aamma t.t. 6 meterit sinnerlugit takissusilinni angallatinik bundgarnersorluni aalisarnermik tapertatut umiatsiaaqqat atorneqarsinnaapput. Imm. 1 umiatsiaaqqat atorlugit aalisarnermi atorneqassanngilaq.

§ 6. Umiatsiaararsorluni aalisarnermut akuersissut inuup nammineq pigisaraa, akuersissummillu pigisaqartoq aalisarnermi pisallu tunineqarneranni peqataasassaaq.

§ 7. Aalisarnerup aallartinnginnerani, nanginneqannginnerani ingerlatileqqinnginneranilu akuersissummut tunngassuteqartunut allanguutit tamarmik aalisarnermut akisussaasumit naalakkersuisoqarfimmit akuerineqassapput, tassanilu ilaapput piginnittuunermet tunngasutigut allanguinerit aamma angallatinik sunilluunnit akuersissummut tunngassuteqartunik taarsiinerit.

§ 8. Inuk imaluunniit inatsisitigut pisinnaatitaasoq pisussaatitaasorlu umiatsiaaqqamik aamma angallammik sinerissamullu qanittumi aalisarnissamut akuersissummik ataatsikkut piginnittuusinnaanngilaq.
Imm. 2. Motorimik ajutoornerup, amutsivimmannerup, sikuunerata malitsigisaanik angallat ingerlatsisinnanngippat, sinerissamut qanittumi angallammik aalisarnissamik akuersissutaatilik umiatsiaaqqamik aalisarnissamut immikkut akuerineqarnissamik aalisarnermut akisussaasumut naalakkersuisoqarfimmut allakkatigut qinnuteqarsinnaavoq. Immikkut akuersissut piffissami angallatip ingerlatsinnginnerata nalaani taamaallaat tunniunneqarsinnaavoq.

§ 9. Akuersissut taassumaluunniit assilinera, taakkununngalu ilangullugu assilinera elektroniskiusoq, aalisarnerup nalaani akuersissutaatillip angallammiitissavaa imaluunniit umiatsiaaqqamiitissavaa.

Kapitali 3

Angallatit atorlugit inuussutissarsiutigalugu aalisarneq

§ 10. Angallatit inuussutissarsiutigalugu aalisarnermut atorneqartussat allakkatigut qinnuteqarnikkut aalisarnermut akisussaasumit naalakkersuisoqarfimmit akuerineqassapput.

Imm. 2. Aalisarnermut akisussaasup naalakkersuisoqarfip angallatit taamaallaat akuerisinnaavai, uku tunngavigalugit:

- 1) Piginnittuunermet pissutsit tamanna pillugu aalisarnermut inatsimmi aalajangersakkanut naapertuuppata, aamma
- 2) angallatip aalisarsinnaassusia aalisarnissamut periarfissanut atuuttunut naleqqussagaasutut nalilerneqarpat.

Imm. 3. Inuaassutsimut uppernarsaatip aammalu usitussutsimut uuttuutip assilineri qinnuteqaammut ilangullugit nassiunneqassapput. Angallat tamatuma kingorna uuttortaqqinneqarpat, motooria pinguarneq taarserneqarpat

allatulluunniit annertuumik allanngortinneqarpat, uuttuutaa eqqortoq nutaaq uuttuutanut allagartap tiguneraniit ulla 14-it qaangiutsinnagit nassiuunneqassaaq.

Imm. 4. Angallatip piginnittua, atia imaluunniit GR-normua tamatuma kingorna allanngorpat inuaassutsimut uppernarsaat eqqortoq nutaaq inuaassutsimut uppernarsaatip tiguneqarneranit ulla 14-it qaangiutsinnagit nassiuunneqassaaq.

Imm. 5. Angallat avataasiortoq imaluunnit sinerissamut qanittorsiortoq allamit pigineqalerpat, pisinermut isumaqatigiissut, pisumit tunisisumillu atsiorneqarsimasoq uppernarsataagallartutut akuerineqassaaq, inuaassutsimut uppernarsaatip nutaaq tunniunneqarnissaata tungaanut.

§ 11. Angallatit uuttorneqarneri naapertorlugit 75 BRT/120 BT ataassimappagit taamatullu usitutigisut sinerissamut qanittumi taamaallaat aalisarsinnaapput, taamaattoq imm. 3-5 takukkit.

Imm. 2. Angallatit uuttorneqarneri malillugit 75 BRT/120 BT sinnerlugit nalunaarneqarsimasut taamaallaat avataani aalisarsinnaapput, taamaattoq imm. 4 aamma 5 takukkit.

Imm. 3. Imm. 1 saattuarniarnermi kapisilinniarnermilu atuutinngilaq.

Imm. 4. Imm. 1 aamma 2 uiluinniarnermi atuutinngillat.

Imm. 5. Raajarniarsinnaatitaaneq imartani Kalaallit Nunaata aalisarnikkut oqartussaaffigisaani sumiiffinnut periarfissiinermut atatillugu raajarnirneq pillugu nalunaarut qaqugukkulluunniit atuuttoq malillugu malittarisassaqaqtinnejarpooq.

§ 12. Angallatip takissusia nalornissutigineqarpat oqartussaasunit piginnaatinneqartunit Søfartsstyrelsenimit akuerisaasunit, angallatip nutaamik uuttortarneqarnissaanik piginnittoq Kalaallit Nunaanni Aalisarsinnaanermut Akuersissutinik Nakkutillisoqarfimmmit peqquneqarsinnaavoq.

Kapitali 4

Akuersissuteqariaatsit

Piffissamik killiliilluni akuersissut pisarineqarsinnaasut annertunerpaaffilerlugit

§ 13. Piffissamut killeqartumut pisarineqarsinnaasut annertunerpaaffilerlugit akuersissut, tassaavoq inuussutissarsiutigalugu aalisarnissamut tunngaviusoq:

- 1) Angallatit 75 BRT/120 BT-it sinnerlugit usitussusillit atorneqarneranni
- 2) uiluinniarnermi, angallatit angissusiat apeqqutaatinnagit,
- 3) aalisarneq pillugu oqartussaaffinni nunat allat imaluunniit nunarsuup immikkoortuini aalisarneq pillugu suleqatigiiffit aalisarnermik malittarisassiorsinnaanermut pisinnaatitaaffigisaanni angallatit Kalaallit Nunaanni nalunaarsorneqarsimasut atorneqarneranni, aamma
- 4) angallatit nunat allaneersut Kalaallit Nunaata aalisarnikkut oqartussaaffigisaaniittut atorneqarneranni.

Imm. 2. Piffissamut killeqartumut pisarineqarsinnaasut annertunerpaaffilerlugit akuersissut, tassaavoq nunat tamalaat imartaanni malittarisassaqaqtitsiviunngitsuni inuussutissarsiutigalugu aalisarnermut tunngaviusoq.

Imm. 3. Akuersissummik tunniussinermut tunngavigineqarput aalisagaqatigijit pillugit pisassiissutitut aalajangersarneqartut nalilerneqarnerat, qinnuteqartut akornanni piginnaasat annertussusiat, aamma tunniussinermi piumasaqaatit Naalakkersuisunit aalajangersarneqartut, takuuk § 28.

Imm. 4. Akuersissut ukiut pisassiiffiusut ataasiakkaarlugit atulersinneqartarpooq. Ilisimatuussutsikkut siunnersuineq ukiunut arlalinnut atuuppat akuersissummik ukiunut pisassiiffiusunut arlalinnut atuuttumik tunniussisoqarsinnaavoq.

Piffissamik killiliilluni akuersissut pisarineqarsinnaasut annertunerpaaffilernagit

§ 14. Piffissamut killeqartumut pisarineqarsinnaasut annertunerpaaffilernagit akuersissut, tassaavoq akuersissut inuussutissarsiutigalugu aalisarnermut tunngaviusoq:

- 1) uumasoqatigiinnik angallatinit Kalaallit Nunaanni nalunaarsorneqarsimasunit ataatsimoorullugu aalisarneqarsinnaasunik pisassiisoqartillugu,
- 2) immikkut pisoqarnerani angallatit Kalaallit Nunaanni nalunaarsorneqarsimasut atorlugit, tamatumani pisassiissutinik aalajangersaanissamut ilisimatuussutsikkut siunnersuinermik tunngavissaqartitsinnginnermi, aamma
- 3) angallatit nunanit allaneersut Kalaallit Nunaata aalisarnikkut oqartussaaffigisaaniittut atorlugit.

Imm. 2. Imm. 1, nr. 1 aamma 2 naapertorlугit akuersissut atulersinneqartoq § 20 aamma § 22 tunngavigalugit pisassaaq.

Imm. 3. Imm. 1, oqaaseqatigiit 3 naapertorlugu akuersissummik tunniussineq nunat tamalaat isumaqatigiissutaat tunngavigalugit pisassaaq.

Imm. 4 Akuersissut ukiut ataasiakkaarlugit tunniunneqartassaaq. Ilisimatuussutsikkut siunnersuineq ukiunut arlalinnut atuuppat akuersissummik ukiunut arlalinnut atuuttumik tunniussisoqarsinnaavoq.

§ 15. Piffissamut killeqartumut pisarineqarsinnaasut annertunerpaaffilernagit akuersissut tassaavoq umiatsiaarorsluni inuussutissarsiutigalugu aalisarnissamut tunngaviusoq.

Imm. 2. Imm. 1 naapertorlugu akuersissummik atulersitsineq § 20 aamma § 22 tunngavigalugit pisassaaq.

Piffissamik killiliigaanngitsumik akuersissut pisarineqarsinnaasut annertunerpaaffilerlugit

§ 16. Piffissamik killiliinani pisarineqarsinnaasunik amerlanerpaaffiliinerit raajarniarnermi angallatillu atorlugit sinerissamut qanittumi qaleralinniarnermi tunngaviussapput.

Imm. 2. Piginnittup pisassiissutinit pigisai akuersissummi allaqqasarput. Pisassiissutinit pigisat tassaapput pisassiissutit tamarmiusut pisassiiffiusumi uumasoqatigiinnik pineqartunik Naalakkersuisut aalajangersarsimasaasa procentinngorlugit ilaat.

Imm. 3. Piffissamik killiliinani pisarineqarsinnaasut annertunerpaaffilerlugit akuersissummut atatillugu ukiut tamaasa ukioq pisassiiffusoq aallartitsinnagu ukiumoortumik pisassiissutit pillugit nalunaarut tunniunneqassaaq, ukumi pineqartumi annertussutsit tunisassiorissamullu akuersissutaasinnaasut taaneqarlutik.

Kapitali 5

Pisassiissutinik nuussineaq

§ 17. Angallateqarluni raajarniarnermut imaluunniit sinerissamut qanittumi qaleralinniarnermut atatillugu piffissamut killiliigaanngitsumut akuersissuteqartoq umiarsuaatileqatigiiffik, takuuk § 16, imm. 1, ukiumoortumik pisassiissutaatiminik tamakkerlugit aalisarsimasoq, imm. 2 naapertorlugu qinnuteqartoqarneratigut ukiumi

pineqartumi novembarip 15-iata kingorna aalisarnerup ingerlatiinnarnissaanut akuerineqarsinnaavod.

Ukiumoortumik pisassiissutit saniatigut pisarineqartut annertussusii ukiup tulliani aalisariutaatileqatigiiffimmut ukiumoortumik pisassiissutigineqartunit ilanngaatigineqassapput.

Imm. 2. Qinnuteqaat aalisarnerup kissaatigineqartutut nanginneqarnissa kingusinnerpaamik sapaatit akunneri marluk sioqqullugit aalisarnermut akisussaasumut naalakkersuisoqarfimmut nassiuunneqassaaq aamma aalisarusutat annertussusii allanneqarsimassallutik.

§ 18. Raajarniarnermut imaluunniit sinerissamut qanittumi qaleralinniarnermut atatillugu piffissamik killiligaanngitsumik akuersissutaatilik umiarsuaatileqatigiiffik, takuu § 16, imm. 1, ukiumut pisassiissutaatimi ilaannik tamakkerlugit aalisarsimanngitsoq, ukiup siuliani pisarineqanngitsut amerlaqataannik ukiumi tulliuttumi ukiumut pisassiissutinik qaffaaffigineqarsinnaavoq. Pisassiissutinit annertussutsit nuunneqartut raajarniarnermi kingusinnerpaamik 30. april pisarineqarsimassapput qaleralinniarnermilu kingusinnerpaamik 1. juli pisarineqarsimassallutik. Ukiumut raajat qaleralillu pisassiissutit nuunneqartut annertussusii aalisarneqanngitsoortut tulleriinneri malillugit 30. april aamma 1. julimi atorunnaassapput.

Imm. 2. Ukiup siuliani pisassiissuteqarfiusumiit ukiumut pisassiissutinit sinerissamut qanittumi qalerallit nuunneqarsimasut annertussusillit ulloq 1. juulip kingorna aalisarneqanngitsut atorunnaarsinnejqarsimappata sumiiffimmi 47-mi sinerissamut qanittumi angallateqatigiit marluusut akornanni ukiumut pisassiissutit taakku Naalakkersuisunit agguateqqinnejqarsinnaapput.

§ 19. Ukiumut pisassiissutinit nuunneqartut, takuu §§ 17 aamma 18, niiverutigineqarsinnaangillat ukiumullu pisassiissutinik nuussiffigineqarsimasumit umiarsuaatileqatigiiffimmit aalisartumilluunniit aalisarneqassallutik.

Kapitali 6

Akuersissummik qinnuteqarneq

Sinerissamut qanittumi aalisarnermi akuersissutinik tunniussisarneq

§ 20. Akuersissut, takuu § 14, imm. 1, nr. 1 aamma 2 aamma § 15, taamaallaat ukiup siuliani taamaaqataanik akuersissuteqarsimasumut ingerlatsisumut kiisalu imm. 3 imaluunniit § 22 naapertorlugu immikkut akuerineqarsimasumut ingerlatsisumut atulersinnejqarsinnaavoq. Akuerissutip atulersinnissaanut tunngaviuvog qinnuteqarsimaneq, takuu § 21.

Imm. 2. Akuersissut, takuu § 14, imm. 1, nr. 1 aamma 2, aamma § 15, decembarip aallaqqataatinnagu iluaqtigineqarsimanngippat ukiumi tulliuttumi akuersissutip atulernissaanut pisinnaatitaaffik atorunnaassaaq.

Imm. 3. Qinnuteqarsimannginneq pissutigalugu, takuu imm. 1, imaluunniit iluaqtigisimannginneri pissutigalugit, takuu imm. 2, akuersissutip atulernissaanut pisinnaatitaaffimmik annaasaqarsimasoq qinnuteqartoq immikkut akuerineqarnissaq pillugu qinnuteqaateqarsinnaavoq, takuu § 22, tamanna ima peqquteqarpat

- a) qinikkatut pisortanillu toqqakkatut suliaqarneq,
- b) inuussutissarsiutigalugu kattuffinni siulersuisuni sulinedq,
- c) ilinniartitaaneq imaluunniit qanigisap ilinniartitaanera,
- d) umiinarneq,
- e) amutsivimmiinneaq,

f) napparsimaneq,

g) ilaquttani qanigisani toqusoqarnera imaluunniit ilungersunartumik napparsimasoqarnera, imaluunniit

h) tunitsivissaqannginned.

Imm. 4. Pisup pineqartup pisimaneranut peqqissaarussamik upternarsaat nassiuinneqarsimappat taamaallaat immikkut akuersisoqarsinnaavoq.

§ 21. Umiatsiaaqqamik sinerissamut qanittumi aalisarsinnaanermut akuersisummiq qinnuteqaat qinnuteqartup kommunimi najugaanut qinnutigineqassaaq. Qinnuteqarnermut immersugassaq www.sullissivik.gl aqqutigalugu pissarsiarineqarsinnaasoq qinnuteqartup atussavaa.

Imm. 2. Angallammik sinerissamut qanittumi akuersisummiq qinnuteqaat aalisarnermut akisussaasumut naalakkersuisoqarfimmut tunniunneqassaaq. Qinnuteqarnermut immersugassaq www.sullissivik.gl aqqutigalugu pissarsiarineqarsinnaasoq qinnuteqartup atussavaa.

§ 22. § 20-mi piumasaqaammiit ingerlatsisussat nutaat immikkut akuerineqarnissaq pillugu qinnuteqassapput.

Siunertamut tassunga www.sullissivik.gl-imi nassaarineqarsinnaasoq qinnuteqarnermut immersugassaq qinnuteqartumit atorneqassaaq.

Imm. 2. Sumut atassuteqarnermut akileraartussaanermullu aalisarneq pillugu inatsimmi piumasaqaatinik naammassinnittunut qinnuteqartunut 18-inik ukioqalersimasunut immikkut akuersisoqarsinnaavoq, taamaattorli takuuk §§ 23 aamma 24. Sinerissamut qanittumi qaleralinniarneq eqqarsaatigalugu 18-inik ukioqalersimasunut 29-illu ukioqalersimasunut qinnuteqartunut taamaallaat immikkut akuersisoqarsinnaavoq. Tamatumma saniatigut qinnuteqartup piumasaqaatit uku naammassimassavai:

- 1) imarsiornermi aalisarnermik ilinniarsimaneq imaluunniit allatigut assingusumik piginnaasaqalersimaneq, aamma
- 2) pigineqassapput angallat kiisalu aalisaatit aalisarnermi atugarineqartussat.

Imm. 3. Assingusunik piginnaaneqarnissaq, takuuk imm. 2, oqaaseqatigiit 1, qinnuteqartup aalisarnermik piginnaasai pillugit makkunanit oqaaseqaateqartitsinikkut upternarsarneqarsinnaapput:

- 1) kommunimit najukkamit,
- 2) najukkami aalisarnermut piniarnermullu peqatigiiffimmit,
- 3) inuup qinnuteqartup aalisaqtigisimasaanit, imaluunniit
- 4) maanna sulisitsisumit siusinnerusukkulluunniit sulisitsisuusimasumit.

Imm. 4. Qinnuteqartoq inuussutissarsiutigalugu piniarnermut imaluunniit inuussutissarsiutigalugu aalisarnermut akuersissutaateqarpat siornatigulluunniit akuersissutaateqarsimappat qinnuteqartup assingusunik piginnaasaqarneranik nalilersuinermi tamanna ilaassaaq.

§ 23. Qinnuteqartoq aalisariummi ukiuni 15-ini kingullerni sumiissusersiortutut aalisartutulluunniit ukiut tallimat sinnerlugit assingusumik suliffeqarsimasoq § 22, imm. 2-mi qanoq ukioqarnissamik piumasaqaammut ilaatinneqannngillat. Akuersisummiq qinnuteqarnermi suliffeqarnikuunermik upternarsaatit nassiuinneqarnerisigut tamanna upternarsarneqassaaq.

§ 24. Allakkatigut qinnuteqareernerup kingorna aalisarnermut akisussaasoq naalakkersuisoqarfik Qaanaami Tunumilu najugalinnut § 20, imm. 1 aamma § 20, imm. 2-mi nr. 1-mi aamma 2-mi piumasaqaatinit immikkut akuersisummiq tunniussisinnaavoq.

§ 25. Naalakkersuisoqarfíup aalisarnermut akisussaasup §§ 20-24-mi naliliinermi atugassanik qinnuteqartoq pillugu paassisutissat pissariaqartinneqartut ukunannga pissarsiarisinaavai:

- 1) kommuni najugaqarfígsaqq,
- 2) najukkami aalisarnermut piniarnermullu peqatigiiffik,
- 3) qinnuteqartup sulisitsisorisimasai.

§ 26. Aalisagaqatigiit pillugit qinnuteqartumut akuersissutip atulersinnissaanut naammassisimasassaanik immikkut piumasaqaateqarsinnaavoq.

Imm. 2. Piumasaqaatit, takuuk imm. 1, aalisagaqatigiinnik pineqartunik aalisarnissamut nalunaarummi qaqugukkulluunniit atuuttumi allassimassapput.

Avataasiorluni aalisarnermi akuersissutinik atulersitsisarneq

§ 27. Avataasiorluni aalisarsinnaanermut akuersissummik qinnuteqaat aalisarnermut akisussaasumut naalakkersuisoqarfímmut tunniunneqassaaq. Avataasiorluni aalisarsinnaanermut qinnuteqarnermut immersugassaaq www.sullissivik.gl aqqutigalugu pissarsiarineqarsinnaasoq qinnuteqartup atussavaa.

Imm. 2. Qaammatisiutit ukiuannut tullermut aalisarsinnaanermut akuersissummik qinnuteqaat, takuuk imm. 1, aalisarnermut akisussaasup naalakkersuisoqarfíup novembarip aallaqqataa nallertinnagu tigoreersimassavaa.

§ 28. Pisassiissutinik agguaneq, takuuk § 13, imm. 3, atugassaritiat makku tunngavigalugit pissaaq:

- 1) Ukiup siuliani pisassiissuteqarsimasunut umiarsuaatileqatigiiffinnut aamma aalisagasaqatigiinnut ataasiakkaanut TAC-p ilaanut umiarsuaatileqatigiit ataasiakkaat pisasaat aallaavigalugit pisassiissutit agguanneqassapput, tassa umiarsusaatileqatigiit pisassiissutinit piviusumik qaqitaat eqqarsaatigineqarsinnaammata.
- 2) Agguassinerup kingorna pisassiissutinit sinneruttoqarpat, takuuk nr. 1, pisassiissutit umiarsuaatileqatigiinnut pioreersunut imaluunniit naalakkersuisoqarfímmut akisussaasumiit naliliisoqarneratigut umiarsuaatileqatigiinnut nutaanut agguanneqarsinnaallutik. Naliliinermi ilaqtigut umiarsuaatileqatigiit immikkut pisassiissutinik pissariaqartitsisinnaanerat, aalisarnerup nunap ilaani inerartornera, aningaasarsiornikkut piujuartitsisumik umiarsuaatileqatigiit qulakeerneqarnissaat eqqarsaatigineqarsinnaapput, tassunga ilangullugu umiarsuaatileqatigiit nutaat ukioq naallugu aningaasarsiornikkut piujuartitsisinnaanerat kiisalu inuiqatigiit aningaasarsiornikkut sapinngisamik annertunerpaamik iluanaaruteqarnissaat.

Kapitali 7

Misileraalluni aalisarneq

§ 29. Inuussutissarsiutigalugu misileraalluni aalisarsinnaanermut kiisalu tassunga akuersissummik qinnuteqaat aalisarnermut akisussaasumut naalakkersuisoqarfímmut tunniunneqassaaq. Qinnuteqarnermut immersugassaaq www.sullissivik.gl aqqutigalugu pissarsiarineqarsinnaasoq qinnuteqartunit atorneqassaaq.

Imm. 2. Misileraalluni aalisarnermik pilersitsinermut inassut, takuuk § 30, allaffissornikkut naliliineq malillugu pissaaq, tamatumanilu tunngavissat tullinnguuttut pingaartinneqarsinnaapput:

- 1) Misileraalluni aalisarnerup siunertaa,
- 2) uumasoqatigiit sorliit qinnuteqarfíuppat,

- 3) sumiiffik suna piffissamilu qaqugukkut taakkut qinnuteqarfippat,
- 4) pisassatut naatsorsuutigineqartut amerlassusiat,
- 5) atortuutit periutsillu suut atorneqassappat,
- 6) uumasoqatigiit qinnuteqaatigineqartut amerlassutsinut tunngasutigut inuussutissarsiutigalugu misileraalluni aalisarnerup nammassinnaaneraat, uumasoqatigiinnik pineqartunik, sumiiffimmik pineqartumik, atortuutinik imaluunniit teknologiimik nutaanik misissuinissamik pisariaqartitsisinnaanerup nalilernissa, aamma
- 7) Pinngortitaleriffiup immami uumassuseqarfiusunik naliliinera.

§ 30. Aalisarnermut akisussaasumit naalakkersuisoqarfimmit inassuteqareernikkut inuussutissarsiutigalugu misileraalluni aalisarnermut akuersissutinik Naalakkersuisut pilersitsisinnaallutillu atulersitsisinnaapput, takuuk § 29.

Imm. 2. Misileraalluni aalisarnerup pilersinnissaanut minnerpaamik uku arlaat siunertaasariaqarpoq:

- 1) uumasoqatigiit ilisimasaqarfiunngitsut pisassiissutaasimannngitsullu,
- 2) sumiiffit ilisimasaqarfiunngitsut imaluunniit uumasoqatigiit aalajangersimasut ilisimasaqarfiunngitsut misissuiffigineqarnissaat,
- 3) periutsit atortulluunniit nutaat atorlugit aalisarnerup ilisimatusarfigineqarnissa,
- 4) aalisarnermi nalilinnik annertusaanerup annertuseriarnissaanut imaluunniit uumassuseqarfiusut kissaatigingisatut sunnigaanerat annikilliniarluq ilapittuuteqarniarnermi, tamatumunngalu atatillugu uumasoqatigiit amerlisaqqinnissaat pissutigalugu aalisarneq unitsinneqarsimappat, ilisimasanik nutaanik pilersitsiniarneq, imaluunniit
- 5) tamanna naleqquttutut nalinerneqarpat aalisarnerit misileeqqiffiusinnaanerat.

Imm. 3. Inuussutissarsiutigalugu misileraalluni aalisarnermi pilersitsinermi misileraalluni aalisarnermi peqataasinnaanermut siunertat aamma tunngavissat atugassarititaasullu immikkut nassuarneqassapput. Piumasaqaatit atugassarititallu tassaasinnaapput:

- 1) aalisakkat suut aalisarneqassanersut,
- 2) pisassiissutit annertussusaat,
- 3) sumiiffit,
- 4) atortut,
- 5) qinnuteqarnissamut piffissaliussat, kiisalu
- 6) nalunaarusiortarnerit akuttussusissaat misiligtissanillu tigusisarnissaq pillugu piumasaqaatit.

§ 31. Inuussutissarsiutigalugu misileraalluni aalisarsinnaanermut akuersissummik pisassiissutissallu amerlassusissaannut qinnuteqaat § 30 naapertorlugu aalisarnermut akisussaasumut naalakkersuisoqarfimmumt tunniunneqassaaq. Qinnuteqartoq inuussutissarsiutigalugu aalisartuussaaq, umiarsuaatileqatigiiffimmiluunniit piginneqataassalluni imaluunniit ingerlatseqatigiiffiussalluni. Qinnuteqarnermut immersugassaq www.sullissivik.gl aqutigalugu pissarsiarineqarsinnaasoq qinnuteqartut atussavaat.

Imm. 2. Qinnuteqaat, takuuk imm. 1, itigartitsissutigineqassaaq misileraalluni aalisarnissamut siunertaq kiisalu piumasaqaatit atugassarititaasullu qinnuteqartup naammassisinnaanngikkunigit, takuuk § 30, imm. 2 aamma 3.

Imm. 3. Akuersissummik pisassiissutillu amerlassusaanik tunniussinermut qinnuteqaatit ataasiakkaat nalilersornerisigut pisassaaq, immikkoortut makku pingaartinneqassallutik:

- 1) Qinnuteqartut qassiunerat pisassiissutit ataatsimut amerlassusiannut naleqqiullugit.

- 2) Angallatip atortulersuutillu piukkunnassusai inuussutissarsiutigalugu misileraalluni aalisarnermi siunertamik pitsaanerpaamik naammassinnissinnaaneq isiginiarneqarluni.
- 3) Qinnuteqartup piginnaasai misilittagaal, inuussutissarsiutigalugu misileraalluni aalisarnermi siunertamik pitsaanerpaamik naammassinnissinnaanera isiginiarneqarluni.

§ 32. Misileraalluni aalisarnissamut akuersissutit assigiinngitsut piffissamut killilimmut atuupput, tassaasinnaallutik pisarineqarsinnaasut amerlanerpaaffilerlugin imaluunniit pisarineqarsinnaasut amerlanerpaaffilernagit.

§ 33. Misileraalluni aalisarsinnaanermut akuersissut ukiut pisassiifflusut ataasiakkaarlugit tunniunneqartarpoq.

§ 34. Misileraalluni aalisarnermit angusat pillugit nalunaaruteqarnerit akuersisummit pigisaqartumit aalisareernerup kingornatigut kingusinnerpaamik qaammatip ataatsip qaangiunnerani aalisarnermut akisussaasumut naalakkersuisoqarfimmun nassiuunneqassapput.

§ 35. Naalakkersuisut ukiut tamaasa misileraalluni aalisarnernik arlaqartunik pilersitsisarput.

Imm. 2. Misileraalluni aalisarnerit, takuuq imm. 1, aalisarnermut akisussaasumit naalakkersuisoqarfimmun tusagassiorfinnut nalunaarutikkut tamanut saqqummiunneqartarpot, tassanilu takuneqarsinnaassaaq piffissaq qinnuteqarnissamut killigititaasoq, kiisalu misileraalluni aalisarnerni assigiinngitsuni tunngaviit suut atorneqarnersut.

Kapitali 8

Angallatinik attartorneq

§ 36. Attartornissamik isumaqtigiiissutit taamaallaat ataasiakkaaginnarlugit kalaallit angallataannit isumaqtigiiissutaasinnaapput. Taamaammat angallat attartornissamik isumaqtigiiissutinut arlalinnut atatillugu aalisarnermik ingerlatsisinnaanngilaq, imaluunniit ataatsikkoortitsilluni saniatigut attartornissamik isumaqtigiiissuteqarsinnaanani.

§ 37. Umiarsuaatileqatigiit immikkut pisuni, soorlu ajutoornerni assingusuniluunniit, inuussutissarsiutigalugu aalisarnerup ingerlannissaanut kalaallit angallataannik utaqqiisaasumik attartornissaq pillugu aalisarnermut akisussaasumut naalakkersuisoqarfimmun qinnuteqarsinnaapput.

Imm. 2. Qinnuteqaammi ilanngunneqassapput:

- 1) tunngavilersuut,
- 2) immikkut pisut pillugit nassuaat, aamma
- 3) attartornissamik isumaqtigiiissut atsiugaq, tassanilu ilanngunneqassapput peqatigisaq attartortitsisoq aamma peqatigisaq attartortuusoq, angallat pineqartoq, akuersissutit sunniuteqarfingineqartut, kiisalu piffissaq angallammik attartorfiusussaq, tassanilu ilanngunneqassaaq piffissaq aallartiffissaq naammassiffissarlu.

§ 38. Attartornerup aallartinnerata naammassineratalu nalaani angallatit attartorneqartut tamarmik usilersortarfia maqassanngillat.

§ 39. Aalisarnermut akisussaasumut naalakkersuisoqarfimmit akuerineqarluni qinnuteqartoq inuussutissarsiutigalu aalisarnermik imaluunniit inuussutissarsiutigalu misileraalluni aalisarnermik ingerlatsinissamut angallammik nunami allameersumik attartorsinnaavoq. Piginnaasanik pisariaqartunik, atortuutunik pisariaqartunik imaluunniit teknologuumik pisariaqartumik kalaallit angallataanni periarfissaqartoqannginnerani akuersisummik tunniussisoqarsinnaavoq, taakkununngalu atatillugu piumasaqaatit uku naammassineqarsimassapput:

- 1) Attartornissamik isumaqatigiissutip assilineqarnera qinnuteqartup nassiuressavaa, tassanilu taaneqarsimassaaq isumaqatigiissummi peqatigisaq attartortitsisoq, peqatigisaq attartortoq, attartornissamik isumaqatigiissutip sivisussusia ulloq aallartiffissa naammassiffissa ilanngulligit, angallatip atia aamma siusinnerusukkut atia/atii, angallatip piginnittuata atia, najugaalu, angallatip nuna erfalasoqarfia. Ulloq naammassiffissatut nalunaarutigisaq sioqqullugu attartornissamik isumaqatigiissut atorunnaarsinnejqarsimassappat, qinnuteqartup tamanna aalisarnermut akisussaasumut naalakkersuisoqarfimmut ingerlaannaq nalunaarutigissavaa.
- 2) Qinnuteqartup angallatip naalagaaffimi sumi angerlarsimaffeqarneranut uppermarsaat, usitussutsimut uuttuitip kiisalu angallatip VMS-imik atortoqarnera IMO-millu normuata uppermarsaataasa assilinerat nassiuressavaai.
- 3) Angallatip arlaannaatigulluunniit UNK pillugu allattuiffimmiennginneranik uppermarsaat qinnuteqartup nassiuressavaa, naalagaaffiup erfalasoqarfusup aalisarnermut oqartussaatitaaniit attuumassuteqartumiit tamatuminnga uppermarsaammik qinnuteqartup pissarsineratigut.
- 4) Naalagaaffik erfalasoqarfusup uku arlannut ilaasortaanera pillugu uppermarsaammik qinnuteqartoq nassiuressaaq:
 - a) Northwest Atlantic Fisheries Organization-imut (NAFO),
 - b) North-east Atlantic Fisheries Commission-imut (NEAFC), imaluunnit
 - c) Nunarsuup immikkoortuani aalisarnermik aqutsinermut suleqatigiiffimmik (RFMO), Naalagaaffit Peqatigii inuussutissat nunalerinerlu pillugit suleqatigiiffimmik (FAO), Port State Measures Agreement-imik (PSMA) aamma FAO-ip atuutilertissimasaanut International Plan of Action to Prevent, Deter and Eliminate Illegal, Unreported and Unregulated Fishing-imik (IUU) isumaqatigiissuteqarnikuusunut.

§ 40. Kalaallit Nunaata aalisarneq pillugu oqartussaaffigaata avataani kalaallit angallataannik aalisarnermut nunanit allanit attartorneq aalisarnermut akisussaasumut naalakkersuisoqarfimmut qinnuteqareernikkut taamaallaat pisinnaavoq, piumasaqaatit uku malillugit:

- 1) Kalaallit angallatai attartornissamik isumaqatigiissummut atatillugu aalisaqqusaanngillat, sumiiffimm pineqartumi aalisarnermut isumaqatigiissut atuussimassappat, aalisarnermullu isumaqatigiissummi attuumassutilimi allatigut aalajangiisoqarsimanngippat.
- 2) Kalaallit aalisariutaat attartornermik isumaqatigiissummut ilaatinneqartut piffissami pineqartumi kalaallit akiuersissutaannik peqassanngillat. Piffissami attartornissamik isumaqatigiissuteqarfiusumi kalaallit akiuersissutaat atorunnaarallassappat. Kalaallit angallataannit pisat attartornissamut isumaqatigiissummut ilaatinneqartut peqatigisap attartorfiusup naalagaaffiata aalisakkanik pisassiissutaannit ilanngaatigineqassappat.
- 3) Kalaallit aalisariutaat uumasoqatigiinnik nunat allat imartaanni taamaallaat aalisarsinnaapput taakku RFMO-mit aqunneqarsimassappata, RFMO-millu attuumassuteqartumi nuna pineqartoq atsioqataasutut atsioqataanngitsutulluunniit suleqataasutut peqatigineqarsimappat.

Kapitali 9

Sunngiffimmi aalisarnermut

§ 41. Sunngiffimmi aalisarneq akuersisummit piumasaqarfuiungilaq, taamaattorli takuuk §§ 42 aamma 43.

Imm. 2. Sunngiffimmi aalisartup pisat tunisinnaanngilai, tassami tunisinermi akuersissut piumasaqaataammat, taamaattorli takuuk § 43.

§ 42. Sunngiffimmi kapisilinniarnermi akuersissut piumasaqaataavoq.

Imm. 2. Sunngiffimmi kapisilinniarneq Namminersornerullutik Oqartussat kapisilinniarneq pillugu nalunaarutaatigut malitarisassaqtinnejarpooq.

§ 43. Sunngiffimmi aalisartunut saarullittassiissutinik tunineqarsinnaasunik Naalakkersuisut aalajangersaasinnaapput. Taakkuninnga pisassiissutinut akuersissut piumasaqaataavoq.

Imm. 2. Saarullinnik tunisinissamut akuersisummit qinnuteqartoq kommunimi angerlarsimaffigisamini qinnuteqassaaq, takuuk imm. 1.

Imm. 3. Qinnuteqartut, takuuk imm. 2, akuersissut pissarsiariniarlugu piumasaqaatit uku naammassisimavaat:

- 1) Qinnuteqartoq Kalaallit Nunaanni inuit nalunaarsorsimaffianni najugaqarfeqassaaq, ukiunilu marlunni siuliuni Kalaallit Nunaanni inuit nalunaarsorsimaffianni najugaqarfeqarsimassalluni,
- 2) Kalaallit Nunaannut tamakkiisumik akileraartartussaatitaassaaq, qaammatisiutillu ukiuni kingullerni marlunni Kalaallit Nunaanni tamakkiisumik akileraartartussaatitaasimassalluni,
- 3) qinnuteqartoq inuussutissarsiatigalugu aalisartuussanngilaq,
- 4) akuersissut tunniunneqartoq tunitsivimmi takutinnejartassaaq,
- 5) uppernarsaatit tamarmik ersarissumik atuarneqarsinnaasumillu immersorneqassapput, aamma
- 6) saarullinnik tunisineq sunngiffimmi aalisartutut akuersissutaateqarfiusussaq taamaallaat pisinnaavoq inuussutissarsiatigalugu aalisartunut tunisineq unitsinneqarsimatinnagu.

Kapitali 10

Aalisarnerup unitsinnera

§ 44. Pisassiissutit imaluunniit ukiumut pisassiissutit tamakkerlugit aalisarneqaraangata, imaluunniit piffissaq aalisarfiusussaq naammassigaangat, aalisarneq ingerlaannartumik unitsinneqassaaq, aamma atortuutit tamarmik qaquinneqarlutik.

Imm. 2. Kalaallit angallataat umiatsiaaraallu ataatsimoorussamik pisassiissuteqarfiusunik aalisartut aalisarnerup unitsinneqarneranik Naalakkersuisut nittartagaatigut, peqataasutullu attuumassuteqartut, toqqaannartumik nalunaarfigineqassapput.

Imm. 3. Nunat allamiut angallataat Kalaallit Nunaata aalisarnermut oqartussaaffigisaani aalisartut aalisarnerup unitsinneqarnera pillugu aalisariutinut toqqaannartumik nalunaarfigineqassapput. Angallatinut EU-meersunut nalunaarutip assinga EU-Kommissionimut nassiuunneqassaaq. Kalaallit angallatiginngisaannut sinneruttunut taamatut nalunaarut nunap pineqartup aalisarnikkut oqartussaasuinut nassiuunneqassaaq.

Imm. 4. Aalisarneq tamarmi unitsinneqassaaq Naalakkersuisut piffissaliussamik aalajangiinerisigut.

Kapitali 11

Pineqaatissiissutit

§ 45. § 3-mik, §§ 4-7-mik, § 9-mik, § . 10, imm. 1, 3 aamma 4-mik, § 11, imm. 1 aamma 2-mik, § 12-mik aamma § 17, imm. 1-imik, § 19-mik, § 36-mik, § 38-mik, 39-mik, § 42, imm. 1-imik aamma § 44, imm. 1 aamma 4-mik unioqqutitsineq pinerluttulerineq pillugu inatsimmi malittarisassat naapertorlugit akiliisitsinermik arsaarinninnermilluunniit pineqaatissiisoqarsinnaavoq.

Imm. 2. Imm. 1 malillugu akiligassiinerit Pinerluttulerinermik inatsimmi kapitali 5-imi malittarisassat naapertorlugit inatsisitigut attuumassutilittut isigineqarsinnaasunut akiliisitsissutigineqarsinnaapput.

Imm. 3. Akiliisitsinerit arsaarinninnerillu imm. 1 aamma 2 malillugit aalajangersarneqartut Nunatta Karsianut tutsinneqassapput.

Kapitali 12

Atortuulersitsineq

§ 46. Nalunaarut 1. decembari 2023-mi atuutilissaq.

Imm. 2. Peqatigisaanik atorunnaarsinneqarput:

- 1) Aalisarsinnaanermut akuersissutit pisassiissutilu pillugit Namminersorlutik Oqartussat nalunaarutaat nr. 47 18. december 2020-meersoq.
- 2) Saarullinniarnermi tunisinermi killilersuineq pillugu Kalaallit Nunaannut nalunaarut nr. 305, 26. juli 1980-imeersoq.

§ 47. § 20, imm. 2-mi allassimasut akuersissutip atorneqarnissaa pillugu piumasaqaatit ulloq 1. januar 2025-mi atuutilissapput.

Namminersorlutik Oqartussat, 27. novembari 2023

Kim Kielsen (atsior.)

Aalisarnermut Piniarnermullu Naalakkersuisoq

/ Emanuel Rosing (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut